

ԿՐՈՆԱԳԻՏԱԿԱՆ

ԱՍԳՐԱՏ ԱՐԵՂԱ ԳԱԼՍՏՅԱՆ

ԶԱԲԱՐԻԱ ԿԱԹՈՂԻԿՈՍ ԶԱԳԵՅԻ

(855-877)

Զաքարիա Զազեցի Կաթողիկոսը թ զարի և ընդհանրապես Հայ Եկեղեցու Հայրապետների փաղանգի մեջ ամենալուսավորյալ և պայծառ դեմքերից մեկն է, որ կարողացավ դժնի ժամանակներում լինել արթուն և իմաստուն վերադիտող իր հոտի համար: Երանաշնորհ Հայրապետի ընտրության պարագան իսկ վկայում է նրա ունեցած և վայելած այն հեղինակության մասին, որով աշխարհական կամ պարզ վանական վիճակում ընտրվեց Կաթողիկոս Հայոց՝ մեկ օրվա մեջ ստանալով հոգևոր բոլոր աստիճանները:

Նրա կյանքի մասին շատ տեղեկություններ և մանրամասնություններ դեռևս բացակայում են: Ուշինչ չկա նրա ծագման և Կաթողիկոսական բարձրագույն աստիճանին կոչվելու նախընթաց շրջանում զբաղեցրած դիրքի և վիճակի մասին: Մատենագրական աղբյուրները բավարարվում են նրան ներկայացնել «յանարատ ի կեանս կեցեալ», «այր սուրբ և առաքինի» և նմանատիպ այլ բնութագրումներով: Դատելով Հայրապետական շրջանի գործունեությունից, կարելի է ասել, որ բացառիկ պայմաններում նրա ընտրությունը ամբողջությամբ արդարացված և արժանի էր: Երանելի Հայրապետը իր կաթողիկոսության 22 տարիների ընթացքում, որ թե՛ հոգևոր և թե՛ քաղաքական իմաստով այնքան էլ պայծառ և խաղաղ չէին Հայ Եկեղեցու և Հայաստանի համար, բազմաշան գործունեությամբ փորձեց ոչ միայն պահպանել և պաշտպանել եղածը, այլև բարելավել ու բարեկարգել: Նահատակություններով և խոստովանական, վկայական մահերով հայտնի այդ ժամանակահատվածում նա ձեռնամուխ եղավ եկեղեցական միության խնդրին՝ այս առիթով թղթակցելով Կ. Պոլսի Փոռ Պատրիարքի հետ (որոնք ցավոք մեզ չեն հասել) և, դուժարելով Շիրակավանի ժողովը (862թ.), մեծ իմաստությամբ Հայկական անկախ թագավորության դադարի շուրջ միավորեց բաժանված և պառակտված նախարարներին, կարողացավ զսպել արաբ արյունռուչոտ ոստիկաններին և նախակարապետը դառնալ Հայկական նոր պետականության՝ Բագրատունյաց թագավորության:

Զաքարիա Զազեցին հեղինակ է նաև շուրջ երկու տասնյակի հասնող տոնախոսական ճառերի ու քարոզների, որոնք բանիբուն Հայրապետի Հոգեկիր և Աստվածամերձ ներաշխարհի լավագույն արտահայտություններն են:

Մխիթարյան Ուխտի միաբան և բազմավաստակ գիտնական Հ. Պողոս Անանյանը մեծ հմտությամբ՝ լայն ներածությամբ, քննական բնագրով և ծանոթագրություններով, Հայ ընթերցողին է ներկայացրել մի սովոր հատոր, որը պարունակում է Զաքարիա Զազեցու տասնչորս ճառերը, որից էլ մենք քաղվածաբար կատարել ենք «Ի Մնունդն Քրիստոսի» ճառի աշխարհաբարի վերածումը:

Այստեղ, սակայն, հարկ ենք համարում նշել, որ մեծանուն գիտնականը իր կատարած երախտարժան գործի ներածականում, ուղղակի կամ անուղակի կերպով, չամչյանական մոտեցմամբ, Զաքարիա Հայրապետին փորձում է ներկայացնել որպես քաղկեղոնական և Հռոմի Աթոռի բարձրագահությունը ընդունող, որին անպայմանորեն պիտի անդրադառնանք մեր ամսագրի առաջիկա համարներին մեկում: Այս ճառը աշխարհարարի վերածելիս մեր նպատակը չի եղել անդրադառնալ և արծարծել այս հարցը, այլ պարզապես հայ ընթերցողին հաղորդակից դարձնել մեր Տիրոջ Մենդյան խորին խորհրդին: Աշխարհարարի վերածումը կատարել ենք քաղվածաբար և ցանկացել մասնավորաբար շեշտել այն հատվածները, որոնցով Աստվածակիր Հայրապետը ներկայացնում է Աստվածորդու Մեռնողով ոչ միայն մարդու, այլև մարդու անհնադանդությամբ ողջ տիեզերքի ու տիեզերական չորս տարրերի (Հող, օդ, ջուր, հուր) անկում ապրած վիճակի վերականգնումը:

ՏԵՐ ԶԱՔԱՐԻԱ ՀԱՅՈՑ ԿԱԹՈՂԻԿՈՍԻ ԽՈՍՔԸ ՄԵՐ ՏԵՐ ՀԻՍՈՒՍ ՔՐԻՍՏՈՍԻ ՇՆՆԴՅԱՆ ՄԱՍԻՆ

Քանզի, եթե մի որևէ թագավորի և ինքնակալ իշխանությամբ ամբողջ երկրի աշխարհակալ միահեծան պետության տիրողի ծննդյան օրը որևէ մեկը ցանկանում է նշել և կամ սեղան բացել, [ապա] մեծ հնարամտություններով, խոհական խորհուրդով, խորագիտությամբ և նրբանկատությամբ է ջանք թափում իր նպատակը իրագործել՝ ըստ արժանվույն թագավորի:

...Իսկ մենք, որ արժանացանք տոնելու թագավորների երկնավոր թագավորի՝ անեղծ և մշտնջենավոր Աստուծո մեծ և հրաշափառ ծննդյան օրը, բերկրալից հրճվանքով, անկողոպտելի ուրախությամբ ցնծալով պիտի ցնծանք: Քանզի, որ Աստուծո կերպարանքն էր և Հոր էության նկարագիրը, կնիքն ու լույսը Մոռիի պատկերի և Պատճառի փառքի ծագումը, անժամանակ և առանց ծորման ծնունդը Հորից, գերազանցը մտքի սահմանից, գեր ի վերս և անսկիզբը անսկիզբ Հորից, անպատմելին մարդկանցից և անծանոթը հրեշտակներից, ճառագայթն ու ճաճանչը Անեղի, Անժամանակի Անժամանակից, Անվայրափակը Անպարունակելիից, Անպարփակելիից, Անպարագրելիից, Անպարագրելիից, Որդին Հորից, Անեղի ծնունդը և Սուրբ Հոգուն փառակիցը, թագավորը սերոփքների, իշխանը երկնավոր պետությունների¹, Հորն Հավասար և զուգակիցը... ժամանակների լրումին Հոր և Սուրբ Հոգու կամքով Հայրական փառքից խոնարհվելով բնակվեց սուրբ Կույսի անարատ արգանդում: Եվ վերցնելով նրա մարմնի հատկություններից՝ մարմնավորվեց, ծառայական կերպով սաղմ-

¹ Հրեշտակները ըստ սուրբ հայրերի բաժանված են երեք դասի, որոնցից յուրաքանչյուրը ունի երեք աստիճան.
Ա. Աթոռը, Քերովքը, Սերովքը Բ. Տերությունը, Զորությունը, Իշխանությունը,
Գ. Պետությունը, Հրեշտակապետը, Հրեշտակը:

նավորվելով և սակավ առ սակավ աճմամբ հասնելով կատարյալ ամբողջականության, միացրեց անպարագրելի աստվածությունը՝ երկու եզրերը կատարյալ ի մի ամփոփելով:

...[ԱՅՍՕՐ] Հինավուրցը մանկանում է, սերովբենների Թագավորը աստղերի միջոցով գուշակվում և մոգերից ընծաներով երկրպագվում: Անվայրափակ Բանը կենդանիների մսուրում է հանգրվանում, սակայն միաժամանակ Հոր Հետ բազմելով փառքի Աթոռին: Դավթի որդին դրվում է գրկի մեջ, բայց և նույն իր խոսքով կրում բոլոր արարածներին: Ըստ մարմնավոր բնության կերակրվեց իր մարմնավոր ծնողից (Նա) Ով կերակրում է ստեղծվածներին, Ով ձեռնատարած սնում է բոլոր արարածներին: Քանզի Կույսի որովայնում աստվածությունը միացավ մարդկային և իմ փրկության համար մարմինը, Հոգին և միտքը միավորեց իր անճառելի բնության Հետ, որպեսզի նմանին նմանով մաքրի, լինելով մարդ ճշմարիտ՝ ծնված Կույսից մարմնով, Հոգով և մաքուր մտքով:

...ՄեծաՀարուստը ինձ նման տնանկացավ, որպեսզի ես իր պատկերով զդեսատավորվելով փառավորվեմ: Լիառատը Հեղվեց իմ դատարկ փոքրկուծկանս վրա, որպեսզի ես Հաղորդակից դառնամ Նրա անճառ փառքին:

Անժամանակ Լույսից անստվեր Լույսի մարդկային բնությամբ նյութական մարմին առնելով [երկու] անգիտելի և այլազան բնությունները միավորվեցին դառնալով մի: Ինչպես երկաթն ու հուրը միախառնվելով ասվում է Հուր՝ սե կամ ծիրանագույն [այնպես էլ] այս դեպքում [ասվում է] մի կերպարանք երկու բնություններից բաղկացած: Այսպիսով նորահրաշ և նորաձև եղան մի անձի, մի դեմքի և մի կերպարանքի մեջ անշփոթաբար միմյանց միացած աստվածային և մարդկային բնությունները, առանց փոփոխվելու իր աստվածությունից, քանզի (Նա) անփոփոխելի է և անպարագրելի: Եվ Աստված պարփակվեց Կույսի որովայնում՝ պարագրելի մարմնում...

Անպարագրելին պարագրվեց Կույսի գրկում՝ անպարունակելին պարունակվեց և անշոշափելին շոշափելի դարձավ, քանզի «Մենք տեսանք Նրան և մեր ձեռքերը շոշափեցին Կենաց Բանը» (Ա ՀՈՎՀ. Ա 1), որ իջավ փրկելու արարածներին:

ԱՅՍՕՐ Հոգեղեն անմահներին ԱնՀասանելին Հասանելի դարձավ կենագործելով արարածներին, Անխմանալին [որպես] այսօրածին մանուկ ճանաչվեց մարդկանցից: Հորից անճառ Բանը, ճառելի մարմնով Կույսի գրկում պարուրվեց, Անքններին քննվեց, անկրելին կրելի դարձավ, անժամանակը սկիզբ ունեցավ, Աստուծո Որդին Կույսի որդի եղավ: Անմայր երկնքում և անՀայր երկրում, անեղը եղականացավ, անստեղծը գոյության կոչվեց, աննյութականը երևաց նյութական մարմնով, անուրը² ծնվեց Հրեաստանի Բեթղեհեմ քաղաքում, աներբը երևաց աշխարհագրի օրերին: Անեզրը սահմանափակված դրվեց կենդանիների մսուրում, անսկիզբը սկզբնավորվեց Կույսից որպես մանուկ ծնվելով, անչափելին սահմանափակման մեջ դրվեց իր ամբողջական մարմնի չափերի պատճառով:

² Անուր-որևէ տեղ և տեղից չեղող, անկետ, անսահման, անբովանդակելի:

ԱՅՍՍՐ անմաշը հողեղենների մահկանացու բնությամբ զգեստավորվեց, հրեղեններից անըմբռնելին՝ ըմբռնվեց, անվայրափակը՝ ամփոփվեց, անպարփակելին՝ պարփակվեց, անտեսանելին՝ տեսնվեց: Լստ գրքի. «Քրիստոս ծնվեց՝ փառավորենք, Քրիստոս մեզ համար խոնարհվեց երկնքից՝ ընդառաջ ելնենք, Քրիստոս մեզ համար վայր իջավ՝ դեպի ստորայիններս՝ վեր ելեք», քանզի սկզբնական խավարը պարաբարձյալ՝ եղավ և անստվեր լույսը ծավալվեց ամբողջ տիեզերքում... քանզի անժամանակ մանուկը ծնվեց մեզ համար, որ նույն ինքը թագավոր է թագավորների և մարգարե և քահանա և պատարագ և բարձրը մարդկանց բոլոր մեղքերի՝ որ է անմայր երկնքում և անհայր երկրում:

ԱՅՍՍՐ Բանն Աստված ծնվեց քարայրում, որպեսզի մարդիկ երկինք հրավիրվեն, խանձարուրում պատվեց, որպեսզի պատռի սաղարթապատ և մաշկեղեն հանդերձը: Բոլորի Տերը բազմում է կենդանիների մասերում, որպեսզի ես, որ հավասարվեցի չորքոտանի կենդանիներին, հրեշտակներին զուգահավասար լինեմ...

Եվ, երբ մեր Տերը ծնվեց քարայրում, Հերովդես արքայի երեսունեղբքերուդ տարում՝ աշխարհագրի ժամանակ, ցոլացող աստղ երևաց արևելքում և ջահավորված ճառագայթներով փայլեց Պարսից աշխարհում, որը մոգերը տեսնելով, արթնացան քնից, և ճշտելով [ուղղությունը] Հետեեցին աստղի ծագմանն ու ընթացքին: «Ո՛ւր» [— մտածում էին, —] որպեսզի նրա միջոցով փութային հասնել նորածին թագավորին երկրպագելու: Եվ աստղի ծագումը հրաշափառ, սքանչելի և զարմանալի էր...

Այդ ժամանակ մոգերը ճանապարհ ընկնելով դեպի Եփրատի⁴ կողմերը, տեսան աստղը, որ առաջնորդում էր իրենց արևելքից և լցվեցին ցնծությամբ: Նույնպես և աստղը նրանց տարավ այնտեղ որտեղ մանուկն էր: Եվ մոգերը լսած լինելով Բաղամի առականներից, թե նրա թագավորութունը ավելի վերագույն է քան Դոգինը՝ հասկացան նրա թագավոր լինելը (Թիվ.Բ. ԻԴ 5-7, 8-9): Նաև այն, որ ասաց. «Պիտի ծագի Հակոբի աստղը» (Թիվ.Բ. ԻԴ 17), այդ խոսքի համաձայն ճանաչեցին նրա Աստված լինելը, և թե «Նա պիտի ննջի ինչպես կորյունն առյուծի և ինչպես առյուծ» (Թիվ.Բ. ԻԴ 9)՝ իմացան նաև նրա թաղվելու մասին: Այդ պատճառով էլ արևելքից իրենց հետ անհրաժեշտ իրեր էին բերել: Եվ ներս մտնելով ընկան մանուկի առջև, խոնարհվելով երկրպագեցին նրան ու բացելով իրենց դանձերը մատուցեցին խունկ որպես [նշան] Աստված լինելու, ոսկի՝ որպես թագավորի և զմուռս՝ որպես [խորհուրդ] աշխարհի փրկության համար մեռնելու: Եվ արդ՝ մենք միախորհուրդ սուրբ մարգարեներին ի վերուստ տրված կանխասացությամբ, Հետեելով երջանիկ ավետարանիչներին, հակամետ լինելով մոգերի հետ և ձայնակցելով սուրբ Հրեշտակներին, որոնք կարապետները եղան Տիրոջ ծննդյան, երգաբանում ենք հրաշափառ օրվա զորությունը:

³ Պարաբարձյալ-ըստ ՆԱՀ-ի «շուրջամակի ի քաց քառմալ ի միջոյ, շմբված, ցրված»:

⁴ Եփրատ-Քաղեքի երկրորդ կիճձ էր Ովրայի մայրը (Ա Մճաց. Բ 19): Ոմանք կարծում են, թե նրա անունով է կոչվում Աբդոնանը կամ Եփրատ վայրը:

ԱՅՍՕՐ Հոր անմարմին Բանը մարմնանում է բանական Հոգով, կատարյալ մտքով, նյութեղեն մարմնում պարունակվելով՝ Աստված է և մարդ՝ վերածնված Բեթղեհեմում:

ԱՅՍՕՐ Հոր կերպարանք Բանը թանձրանում է և անմատույց լույսից ճառագայթելով Կույսի արգանդում բաղադրյալ մարմնով մանկանում է ըստ մարդկային բնության օրենքի՝ իննամսյա ժամանակից Հետո կատարելապես ծնվում է քարայրում, Աստված և մարդ լինելով: Նորածն և Հրաշափառ կերպով միախառնվում են բնությունները, քանզի մեր փրկության Համար Բանի աննյութ և անմարմին բնությունը միանում է մեր նյութական և Հոգեղեն բնության Հետ, որպեսզի մեր կերպարանքով զգեստավորվի և անմիանալիներին վերստին միավորի:

ԱՅՍՕՐ տիեզերական ոլորտներում ցրվում է մեղքի խավարը և Հաստատվում անսովոր լույսը:

ԱՅՍՕՐ Բեթղեհեմի քարայրը երկինք դարձավ, մսուրը՝ աթոռ քերովբեական, իսկ Բեթղեհեմը՝ երկիր ուրախության, քանզի երկնքում անմայրը անժամանակ Բանն Աստված անՀայր ծնվեց երկրում, որպեսզի մենք բոլորի պատճառ եղողին Հայր վերակոչենք:

ԱՅՍՕՐ Մեղքիսեղանին է իր մեջ բովանդակում, անմայրն անՀայր լինելով, քանզի մեզ Համար այսօր մարդարե, թագավոր և քահանա ծնվեց:

ԱՅՍՕՐ ուրախանում է երկինքը և ցնծում երկիրը, քանզի Հավիտյաններից առաջ [եղող] անսկիզբ Բանը տիրապես կամեցավ խոնարհվելով ծառայի կերպարանքով զգեստավորվել Կույսից՝ նախապես անապական սրբվածից, [աշխարհ] եկած Աստված և վերածնված որպես մարդ միշտ Հոր Հետ լինելով:

ԱՅՍՕՐ ուրախացան վեցթեյան սրբասաց սերովբեները, քանզի Նրանից՝ Ում փայլակնացայտ և արփաճաճանչ լույսից զարհուրելով դողում են և թեւսքողելով ծածկում իրենց դեմքերը, այսօր տեսնում էին [Նրան] անճառաբար մանկացած և խանձարուրում պատված Հեթանոսների փրկության Համար: Ծնծությունը ուրախանում են բազմադուռն սերովբեները, քանզի անժամանակ Որդին, անսովոր Լույսը անժամանակ Լույս Հորից այժմածին մանուկ ծնվեց Բեթղեհեմում՝ [որպես] Քրիստոս Թագավոր, Մեսիա և Իշխան Հոգեղեն պետությունների:

ԱՅՍՕՐ փառավորելով Հրճվեցին պետությունները, քանզի Հորը և Սուրբ Հոգուն իսկակիցը⁵ և արարիչը պետությունների, իշխանը Հոգեղենների Հոր մոտ լինելով մանուկ էմանուելն, որ նշանակում է Աստված Հաճեցավ մեզ Հետ լինել, ճշմարիտ մարդեղությունը այժմ երկնքից իջնելով անմահության Հաց եղավ մեզ Համար:

ԱՅՍՕՐ ուրախացած զվարճացան Հրեշտակներն ու Հրեշտակապետները, որոնք սուրբ և անարատ Կույսից մարմնացած Բանի մասին երգում են «Փառք բարձրունքներում», որ սուրբ քարայրում իջնանելով ծնվեց Աստված և մարդ վերածնված և գերազանց քան եզականներիս բնությունը ներգործելով և ամփոփվելով պարագրվում է մարմնում անճառաբար՝ ըստ մարմնի Հրեաներից, սակայն բոլորի Համար Աստված լինելով օրհնյալ Հավիտյան:

⁵ Իսկակից-Էակից, ԳոյՊաե, Ռամաե, ԳոյՊ Էուփյուճից

ԱՅՍՕՐ ուրախացած զվարճանում են երկինքն ու երկնավոր զորութիւնները, քանզի անհասանելի Հոր անձնավորութեան լուսն ու էութեան նկարագիր Բանը, որ վերահանգչում է քառակերպյան անձեռագործ աթոռի վրա, տնօրինարար բազմել է կենդանիների մսուրում, անբաժանելի լինելով Հայրական ծոցից:

ԱՅՍՕՐ նորոգվելով պայծառացան երկիրն ու կենդանիները, քանզի Հավիտյաններից առաջ եղող Հոր անիմանալի ծնունդ Որդին, այսօր անարատ սուրբ Կուսից մեր նման լինելով և կենագործելով մարդկանց, ընծաներով է պաշտւում արեւելքի պարսկական զորականներից:

ԱՅՍՕՐ Հրճվելով զվարճանում են Բեթղեհեմն ու այն քարայրը որտեղ Նա ծնվեց և ցնծում է երկիրը Եփրաթի, քանզի Հոր անսկիզբ Բանը քարայրում ծնվեց որպէս Էմմանուել մանուկ, որով Աստված մեզ հետ է, Թագավոր Իսրայելի և կենագործող Հեթանոսների:

ԱՅՍՕՐ Հրճվելով ուրախանում է տիեզերքը անպարփակելի Թագավորի ծննդյան Համար, որ սուրբ Կուսից ծագեց մեզ Համար բարձունքների արդարութեան արեգակը և Հրանուտ ու արփահւրաշ ճառագայթներով ստորիններին ջախավորեց:

ԱՅՍՕՐ ցնծում են դաշտերն ու անտառները, քանզի Հոր էութեան նկարագիր և պատկեր անհասանելի և անբովանդակելի Բանը, այսօր Հաճեց Հոգեղեն ծառայի կերպարանք ստանալ՝ անժամանակ Որդին և ժամանակների արարիչը ժամանակի մեջ մանկացավ:

ԱՅՍՕՐ ցնծում են լեռները, զվարճանում բլուրները, լուսավորյալ պայծառանում են անապատները և ճգնազգայց սրբերը միանձնական դասերով, քանզի անեղանելին Աստված և փառքի Թագավորը խոնարհվեց երկնքից և իջավ արարածներին փրկելու գոռոզից⁶:

ԱՅՍՕՐ զվարճացան Համորեն ջրերը բոլոր զեռուններով, քանզի փառքի ծագումն ու ճառագայթը Հորից գալով մարդացավ Սուրբ Կուսից և բազմում է կենդանիների մսուրում, որին Հովիվները տեսնելով ընծայարեր էին լինում և Հրեշտակների հետ երգաբանյալ աղաղակում. «Փառք բարձունքներում», որ առաքեց Բանը մեզ ի փրկութիւն: Պայծառանում է նաև արեգակը իր ոսկեճաճանչ ճառագայթներով բովանդակ և քաջա-Հարմար⁷ աստղերով, քանզի սքանչելագործ Աստուծո Որդին, Ում անբավելի բնութիւնը երկինքը չէր բավականանում ընդունելու, արարածների փրկութեան Համար իջեանում է սուրբ քարայրում, անեղծութեան փառքի Համար արարածներին ազատելով ապականութեան ծառայութեանից:

ԱՅՍՕՐ ցնծում են ամբողջ աշխարհի Հեթանոսները, քանզի Աստուծո Որդին իջնելով վերացրեց անեծքի պատուհասը և նեղ ու անձուկ ճանապարհը բացեց, [որպեսզի] անկյալ Հրեշտակների փոխարեն մարդը վերաթեւի դեպի [երկինք]:

ԱՅՍՕՐ ցնծալով բերկրում է սուրբ եկեղեցին, քանզի անհասանելի և անքննելի Հոր էութիւնից Բանը Հրաշագործեց մեզ Համար որպէս

⁶ Գոռոզ-սատանա, չար:

⁷ Քաջահարմար-գեղեցկահարմար, բարեհարմար, ցերեպոնակ:

արգարության արեգակ՝ պարագրված մարմնում մտքին և խոսքին անհասանելի կերպով, որի համար երկինքն օրհնում և երկիրը ուրախությամբ գովում է Սուրբ Հոգուն փառակցին:

ԱՅՍՕՐ ցնծալով բերկրում է վերին նրուսաղեմը և զվարճանում Սիոն մայր եկեղեցին, քանզի մեզ համար փայլակնացայտ լույսի վերարկողը⁸ խանձարարուրում բովանդակվեց, որպեսզի նախաստեղծի պատրանքի պատճառով մերկացյալներին պճնելով զարգարի լուսազգյաց պատմուճանով՝ վերադասելով երկնքի հրեշտակների հետ:

ԱՅՍՕՐ փառքի թագավորը, որից զարհուրելով դողում էին հրեշտակների բյուրավոր բանակները, ծնվեց անապական կույսից, անտեսն ու անքնինը, քառակերպաններից⁹ վեհագույնը¹⁰ խանձարուրում պատվեց՝ արևելքից երկրպագվելով ընծաներով:

ԱՅՍՕՐ անապական կույսից ծնվեց թագավորների թագավոր Քրիստոս և մակասփոված¹¹ արարչական պարգևները ծավալելով սփռեց ամբողջ տիեզերքում, որից արփիափայլված հեթանոսները մերկացան տխրական կարծրությունից, Ում միշտ իրեն կամական¹² չորեքկերպյան կենդանիների հետ միասին օրհնարանում են մշտնջենավոր երգով:

...ԱՅՍՕՐ Սինա լեռան փոխարեն Բեթղեհեմն է հայտնում և (տասնաբանյայի) տախտակների փոխարեն Ավետարանը պարգևում մեզ, քանզի այն ժամանակ, որ անապատի անկեզ մորենու մեջ երևաց Մովսեսին և նա չէր համարձակվում մերձենալ ու դիտել [Նրա] տեսքը, այժմ խանձարրապատ հայտնվում է ամբողջ մարդկությանը: Այնտեղ Մովսեսն ասում էր. «Գնամ և տեսնեմ այն ահավոր տեսարանը» (ԵԼՔ Գ 3), իսկ այստեղ Հովիվներն էին ասում. «Երթանք Բեթղեհեմ և տեսնենք, թե ի՞նչ տեսարան է գա» (ՂՈԻԿ. Բ 15): Եվ Նրան, որ ժամանակին Մովսեսը չկարողացավ տեսնել, թեպետև բազում անգամներ թախանձեց և միայն աղոտ կերպով թիկունքը նաև վեմով վարադուրված տեսավ, այսօր ժամանակների լրումին, Հրեաստանի Բեթղեհեմ քաղաքում, քարայրի մեջ բուրբուրող մեծ տեսնվում, որը դիտելով ամբողջ տիեզերքը ուրախացավ և հրավիրվեց [մասնակցելու] անզրավ¹³ ուրախությանը:

ԱՅՆ ԺԱՄԱՆԱԿ՝ անապատում, Իսրայելի բյուրավոր բանակներին կերակրում էր մանանայով և լորամարգիներով, այսօր անապական մարմինն ու սուրբ արյունն է ընծայում տիեզերքի փրկության և մեղքերի թողության համար՝ որպես հանդերձյալ անվախճան կյանքի առհավատչյա:

ԱՅՆ ԺԱՄԱՆԱԿ, որ ամպի և հրե սյունով էր առաջնորդում եբրայեցիների բանակին, այսօր ճառագայթող աստղով էր արևելքից առաջնորդում մոգերին դեպի քարայրը և լուսավոր ու արփիահրաշ ամպով կառավարում տիեզերքը՝ վերին նրուսաղեմ Մեծ Սիոնում գտնվող արդարների հավիտենական հարկերը: Նա, Ով Հաճախ Մովսեսին ասաց. «Ես եմ Աբրահամի

⁸ Վերարկող-սկզբնավորող:

⁹ Բառակերպյալ-քերականների հատկացիքը:

¹⁰ Վեհագույն-վերագույն, վեր գտնվող:

¹¹ Մակասփովել-մակերեսից սփռված, այսինքն իր սոտ եղած:

¹² Կամական-կամակից:

¹³ Անզրավ-անավարտ, անեզր, անվախճան, անսպառ, անբավ:

Աստվածը, Իսահակի Աստվածը և Հակոբի Աստվածը: Ես իջա, որ փրկեմ Իսրայելի որդիներին Փարավոնի ձեռքից, որովհետև նրանց նեղության աղաղակը, որ նրանք կրում են եգիպտացիներից, հասավ ինձ», (ԵԼՔ Գ 6, Ծ), այսօր լսեցի մաքուր լեզուի ձայնը և իջա փրկելու նրան անմարմին փարավոնից, որը պաշարեց մեղքով վիրավորելով: Նա՝ Ում Եղիան որպես լույս գերահրաշ երեսմն տեսնում էր Քորեբ լեռան վրա և չէր կարողանում մոտենալ անմերձենալի Աստծուն, այլ թիկնոցով քողարկելով վարագուրում էր իր դեմքը, Հավիտյանների ավարտին հայտնվելով նփրաթում, մարմնով վարագուրյալ ծածկեց իր անհասանելի աստվածությունը՝ Բրիստոս բնակվելով մեր սրտում հավատքի ներգործությամբ:

Արդ, որովհետև արժանացանք այսպիսի հրաշափառ և գերամբարձյալ¹⁴ այս տոնը տոնելուն, ընթանանք աստղերի հետ, մոգերի հետ ընծայաբեր լինենք, հովիվների հետ երկրպագենք, երկնային զորքերի հետ օրհնաբանենք և փառավորենք մարմնով ծնված Բանն Աստծուն, որի հետ Հորը, միաժամանակ և Սուրբ Հոգուն փառք, այժմ և միշտ և հավիտյանս հավիտենից. ամեն:



¹⁴ Գերամբարձյալ-ճույժ բարձր, գերազույժ: